

四庫全書

集部

欽定四庫全書

石門文字禪卷十

宋 釋覺範 撰

七言律詩

十五日立春

千年像教唐朝寺雪後新年晴復陰  
殘僧無事春又至  
游客不來山自深  
長廊掃葉望空翠  
小閣卷經橫水沉  
三生白業有言說  
一念淨心無古今

晚步歸西崦

屋除有路入深壑，曳履脩然獨往還。  
播穀風光寒日近，摘茶時節亂山間。  
花枝重少人甘老，燕子空忙春自閒。  
歸晚斷橋逢野水，更能揜手弄潺湲。

宗公以蘭見遺，風葉蕭散，蘭芽並茁一榦雙花。

鬬開，宗以為瑞，乞詩記其事。

深林忽見蘭芽茁，不謂無人亦自賢。  
數葉橫風作纖瘦，雙花含雪吐明鮮。  
照人秀色雖堪盡，入骨真香不可傳。  
今日東君應擇壻，誰家兄弟鬬清妍。

黃幼安適過予所居題詩草聖甚妙

懷袖功名手未探  
亂頭睡美厭朝參  
筆端五色藻萬象  
曾次大千供劇談  
山寺尋僧宿風雨  
水軒見月出東南  
題詩滿壁龍蛇動  
盛事他年說草庵

元夕讀書罷假寐

燈下文章已倦看  
欲憑詩苦洗辛酸  
世途忽起風波易  
富貴不忘貧賤難  
桃塢路迷安石塚  
桐川水落子陵灘  
卧聞屐響東廊靜  
催粥華鯨吼夜殘

示忠子

夢冷寒庭半夜雨幽欣臨曉一番晴柳嬌困頓欲眠去  
禽作清圓喚起聲曳履點殘山寺靜開經拾得紙窓明  
去年今日岐亭路吹鬢塵埃研足行

訪鑒師不遇書其壁

獨自來游微雨後道人乞食及清晨應門童子能迎客  
滿地榆錢欲買春花醉發狂風日釅柳眠喚起語音真  
政當借榻酬無事熟軒從教聒四鄰

資國寺春晚

龍鄉戒曉月空斜  
喚起清圓響絡車  
燒筍餉田村窈窕  
拾薪煮繭語諠譁  
美忻崖蜜嘗新果  
香識山樊稱意花  
歸去路迷光已夕  
浸門春水一池蛙

聞龔德莊入山先一日作詩迎之

夢暖不知窓霧白  
眼寒初愛穀羅輕  
欣聞明日一龔至  
想見隨軒二李行  
夜雨曉晴寒食近  
水流花發子規聲  
披襟散坐青林下  
依約斜川萬古情

晚秋溪行

熟路沿溪過石橋  
掃除秋晚淨迢迢  
幽尋忽見蘭芽茁  
小立仍逢柿葉飄  
撲水飛雙去鳥珍  
瓏山響一聲樵  
歸來半掩殘經在  
燕寢香凝碧未消

張氏快軒

草樹分明天遠大  
酒闌登賞更從容  
眼寒數點鴈橫雨  
耳熱一窓風度松  
光滑紙開秋色闊  
淋漓墨潑暮煙濃  
欲傾蛟室瓊詞句  
試借溫江卓筆峯

秋晚同超然山行

諸方游徧渾如夢古寺歸來獨掩扃無復詩篇雲錦段  
但餘心境木蛇形高秋霜葉魚鰓赤落日遠山螺髻青  
步盡松陰忽回首綠蘿疎處見谿亭

送淨心大師住溫州江心寺

萬鍛爐中百怨門哲人雖往典刑存掃除臨濟實頭謗  
稱賞黃龍的骨孫夢澤於菟三口視丹山雛鳳九苞文  
還鄉妙曲誰能聽一笛波心兩岸聞



和清上人

駒兒墮地已汗血毛骨蕭森落眼中今見馬羣方弄影  
會看雷電疾追風媒龍何止十倍價凡馬終當一洗空  
我是道林能賞駿識君語妙到無同

升上人過石門

門巷榆錢疊紫苔十年心事首重回暑風院落書籤響  
煙雨江村畫牒開瓦枕藤牀初破睡蔗漿冰碗欲生埃  
風簷獨立看遺照忽有溪僧犯犬來

夏日偶書二首

碧縷橫斜試水沉紅腮甘冷嚼來禽含風廣殿聞棋響  
轉日回廊暗柳陰強撚冰紉餘睡色倦憑棊几適閒心  
攀翻浣衲黃塵事過眼雲蹤不可尋

偏地知誰柳際門消閑自掃竹西軒井花曉汲聞餘滴  
篆燒風摧覓舊痕夢境消磨驚歲月道鄉彷彿見藩垣  
寶書半摺山房寂卧聽嬌鶯說怨思

鄒必東竹枕

黑甜誰欲當閒味此枕令人穩稱心風骨子猷居處竹  
典刑元亮醉時琴宜籠霧鬢清圓語聽學朱絃發越音  
不用製囊裁古錦春寒長搭開花衾

竹爐

博山沉水覺塵埃旋斫凌雲綠玉材自拭錦裯含淚粉  
要焚銀葉返菟梅意消未掩黃庭卷火冷空餘白雪灰  
應把熏衣閉深閣流蘇想見畫屏開

七月四日晝夢雲庵和尚教誨久之而覺作此

示超然

夏窓午睡誰呼覺  
院靜惟聞遶砌泉  
夢裏緒言猶可記  
壁間遺像尚依然  
襯珠定使拳披見  
坐榻當令膝處穿  
塔在層峯衰眼力  
何時同汝掃頽墀

雲庵塔有雙桐作此寄因姪

十年不掃先師塔  
聞有雙桐護石根  
多寶佛應分半座  
主林神對現前身  
詩成坐對南州祖  
寫寄山中玉澗因  
他日就陰當縛屋  
歲時香火願為隣

中秋對月

好天涼夕病衰餘散步中庭瘦策扶禪客相逢宿山寺  
玉輪同看上雲衢十分歸思懸江國一半秋光入鬢鬚  
草露濕衣香霧重更將毛骨洗冰壺

至上高謁李先甲會淵才德修

先甲志大性重遲是中可築平生基心期功名定不赦  
未識所與游從誰淵才人間汗血驥德修天上麒麟兒  
知君懷中有卿相探手但未忙取之

次韻睿廓然送僧還東吳

征夫應為指柴扉湖水當門可濯衣飛鳥已知今日倦  
舊鄰那悟昔人非山情已作煨雞淨世味真如嚼蠟微  
遙想夜航無管束棹歌應載月明歸

送瑩上人游衡嶽

紫蓋峯頭樓閣生朱靈洞口水雲晴盤空路作驚蛇去  
落日人如凍蟻行重郭老師今健否藏年珍木但聞名  
定應自掃巖邊石時發披雲嘯月聲

寄草堂上人

首夏年芳尚可尋興來芒屨恣登臨  
回頭故國煙波闊分袂幽人歲月深  
落日杜鵑山館靜薰風芳草柳塘陰  
知君宴坐忘機地謾寄新詩話此心

酬潛上人

滿鈎疎箔卷簷楹秋靜江天刮眼明  
梵冊已翻千偈妙爐香未散一堂清  
沾衣菊露情闕松聲夢不成

我與道人緣分熟可能朝夕厭逢迎

贈爲上人游方昭默之予也

年少辭師作遠游人言虎穴不生彪家聲自古能名世  
氣宇如今已食牛奪得我機方肯住從教棒打不回頭  
雲山萬疊翛然去江漢無風一葉舟

鄧秀才就武舉作詩美之

丈夫氣自磨牛斗正似豐城獄屋刀富貴豈終憑鐵硯  
功名先看擲霜毫蘆鞭未稱迎風帽紫綬從來賽綠袍  
杖策軍門君記取祖宗漢室舊勲勞



崇勝寺後竹千餘竿獨一根秀出呼爲竹尊者  
高節長身老不枯平生風骨自清癯愛君脩竹爲尊者  
却笑寒松作大夫不見同行木上座空餘聽法石爲徒  
戲將秋色供齋鉢抹月披雲得飽無

童子名道員年五歲餘不如輩隨母往來禪林  
旦夕稍長即與落髮覓詩作此授之

氣與秋容一倍清出塵風骨自天成逢僧論性人皆說  
指佛高談母亦驚已覺君家鍾善慶從來我法付豪英

他年勘徧諸方老古寺編蒲更道情

題水鏡軒

小軒明快照巖阿得道幽人喜氣多但視世間如水鏡  
方知夢境有山河佳眠不礙林光入清坐何妨夜月過  
我亦思歸老邱壑結鄰西崦肯容麼

同吳家兄弟游東山約仲誠不至

東山重到讀題名勝踐清游此合并霧雨開晴秋滿眼  
暮雲欲合句先成走禪壁月寒林靜來客蘭叢玉樹清

我老吐詞如朽木蒸成芝菌報升平

器之示異中見懷次韻

折脚鎗尋穩處安對君此夕久盟寒狐裘不合須羊袖  
藥籠何妨缺夜千秋壘此時驅健犢道山何日跨歸鸞  
仙鑪只隔數邱耳上水船方厄瀨湍

書鑒上人香巖堂

堂前叢玉知誰種叢下高人自掃除未論擊磬回顧眇  
先欣秀色上眉鬚隨宜萬偈風宣說頓現千身月寫摹

就地對誰曾盡餅當年饒水救飢無

冷然齋

以身為舌毗尼藏儼此空齋鏡面清蟬蛻塵埃軒蓋集  
蝶成冤夢篆煙輕蘆圖世界分遺境玉塵天花委落英  
鉢在道山歸去好摩挲風馭笑平生

謝性之惠茶

午窓石碾哀怨語活火銀瓶暗浪翻射眼色隨雲脚亂  
上眉甘作乳花繁味香已覺臣雙井聲價從來友壑源

却憶高人不同試暮山空翠共無言

訪友人二首

海棠雨過尚嬌春袖手來尋林下人未話柳條堪結紐  
且欣梅子可嘗新孤蹤袞袞風中絮萬事紛紛夢裏塵  
他日別山重會面定知談笑絕鮮陳

日暮荒城倚瘦藤江南春思倍添增那知淮水黃塵路  
忽見廬山綠髮僧乞食久辭煙際寺連牀今對夜深燈  
明年我亦尋君去同陟天池最上層

石臺夜坐二首

故鄉乃有此叢林下板何妨著寂音永與世遺他日志  
尚嫌山淺暮年心凍雲未放僧窓曉折竹方知夜雪深  
琢句自應清似玉更宜坡字硬黃臨

歲晚山深過客稀一燈清坐夜同誰滴階寒響雪消後  
通火活紅灰陷時斂目舊游真可數蓋棺前事尚難知  
古今不隔諸緣淨盡出巖中道者詩

胡卿才時思亭

祇今冢木上雲雨想見音容無恙時竟作懷歸戀雲舍  
空餘淚眼看風枝功名未洗終天恨歲月難忘罔極悲  
已覺夜林無觸鹿但看几硯出靈芝

題此君軒

解知無竹令人俗日報平安候起居所以此君揖冰雪  
長吟餘翠滿衣裾瘦行清坐搜詩處雨葉風枝解籜初  
試作小軒聊寄傲愛君生計未為疎

喜文首座至

機鋒不減矮師叔聞說叢林最飽參無暇對人收冷涕  
却能為我出寒巖春江柔櫓何時聽夜雨山房且對談  
掣電一懽端可貴此生俱是再眠蠶

超然自見軒

叢林爭致致不得繭足徑來尋儼師幽境自能情外見  
高懷獨出世間癡清晨倚檻臨黃卷五月亂山聞子規  
夙習尚嗟消未盡壁間時錄和陶詩

清大師還姑蘇塔其師骨石弔之兼簡其弟



聞說高懷照雪霜道容一見自清涼今隨生死晦心月  
空使湖山藹德香故紙不堪看竹籠凝塵那忍拂繩牀  
安門弟子真持遠獨為斯人未始亡

閩僧不食已四十年贈之

銀髮齊眉衲半肩相逢古寺獨欣然自云出嶺三千里  
人見空餘四十年擬欲就君求此術預憂臨食必流涎  
何如萬事隨緣過飢即須殮困即眠

元祐五年秋嘗宿獨木為詩以自遣今復過此

追舊感歎用韻示超然二首

獨木江頭纜客船  
暮江秋色兩依然  
落霞片段紅綳水  
危岫參差碧挂天  
名利到頭成底事  
田園歸得是何年  
崢嶸壯志消磨盡  
滿目西風只自憐

蹤跡漂流不繫船  
舊游曾到意茫然  
玉笙哀怨初涼夜  
秋月嬋娟落木天  
往事已嗟如昨夢  
壯懷無復似當年  
鑪峯當眼空相向  
因念區區想見憐

與客啜茶戲成

道人要我煮溫山似識相如病裏顏金鼎浪翻螃蟹眼  
玉甌絞刷鷓鴣斑津津白乳衝眉上拂拂清風產腋間  
喚起晴窓春書夢絕憐佳味少人攀

宿香城寺

夜晴風細月華清遶寺霜筠雪竹聲錫響僧歸帝青寶  
夢香入宿水沉城古今不隔塵都盡心境俱忘鏡對明  
枕臂曉猿三叫絕小窓燈暗讀殘經

自張平道入瑤谿

衝虎曾經落照村千峯盤盡始登門慣聞跛脚阿師法  
喜見橫行道者孫愛客精神清入畫游方蹤跡夜重論  
杖藜又入層雲去知有安公舊隱存

九峯夜坐

千峯萬峯自雲雨一宿兩宿心頽然不知人間歲云暮  
但覺澗風吹夜泉地爐火燄水正泣篝燈委昏僧未眠  
古人去我不甚遠何必想像臨遺編

同世承世英世隆三伯仲蔡定國劉達道登滕

王閣

承英連壁光照坐更著阿隆如鼎安老兵先馳啓闕鑰  
西山奔走登攔干劉郎端默自凝遠蔡侯奮髯牙齒寒  
但餘衰老百無用搜句倚攔方細看

寄李大卿

瓶盃又復寄西州彌勒同龕古寺幽睡起忽殘三月夏  
朝來拾得一簾秋浮雲世事慵料理斷梗閑蹤任去留  
投老山林多勝槩杖藜何日復同游

余居百丈天覺方註楞嚴以書見邀作此寄之

二首

風定晴雲欲墮崩  
林梢樓閣旋添增  
一生高世清閑侶  
千尺當門紫翠層  
對客不妨拴壞衲  
倦禪時作靠枯藤  
暮年古格叢林在  
重撥塵龕大智燈

三世如來尊頂法  
覆藏深密碧螺寒  
通身是眼自不見  
壁面出頭窺更難  
四義僅能分肉髻  
八還終恐隔花冠  
爭如劈佛丹霞手  
揭露從教覲體看

寄龍安照禪師

隨分叢林古格存，龍安真是泐潭孫。  
獨持一節無求世，勘破諸方不出門。  
石虎已忘蹲草見，木蛇久滅住山痕。  
遙知百事俱衰落，尚有工夫虱自捫。

聞龍安往夏口迎張左丞，遂沂流至鄂渚相別。  
還山作此寄之。

無盡龍安兩勑敵，大梅龐老是同參。  
近聞赤壁同登賞，想見清風助笑談。  
已作汎舟游夏口，又成橫錫過江南。

歸來萬壑松聲在依舊閑雲沒草庵

別龍安

竭來幕阜峯前寺彌勒同龕兩見秋今日他山生遠念  
何年此地復重游主人有道忘欣厭閑客無求任去留  
索紙題詩聊贈別更哦江海一沙鷗

次韻無代送僧歸吳

春掠湓江綠染眸多情還解向東流故應夜夢清蒼勝  
欲趁春光爛熳游飽學尚嗟心未死痛吟已覺鬢先秋



何當一棹華亭上，閑唱波寒月滿舟。

懷友人

尋常輕別尚消魂，何況交情過弟昆。  
孰謂此身閑日月，自慚疎跡信乾坤。  
冷冷小雨江邊路，薄薄浮煙竹外村。  
回首舊游方契闊，孤舟何處宿黃昏。

汪履道家觀古書

風流前輩已成塵，筆跡猶為世所珍。  
促膝猛觀驚盛事，臨風長想見斯人。  
氣生偉逸龍蛇動，秀發精神點畫新。

破篋尚能多此物且欣汪子未全貧

悼性上人

三年三過龍安寺疊疊清談解逼人  
顧我偷閑久無侶與君數面自成親  
轉頭忽作幽冥隔彈指空驚夢寐新  
病眼看秋欲淒眩攀翻投老一傷神

秋日還廬山故人書因以為寄

風葉鳴廊夜色晴隔雲微月稍分明  
下簾徒怯衣裳薄拂榻空驚枕簟清  
病眼得秋還少睡壯心於世尚多情

何時却作廬山去渡水穿雲取次行

誠上人求詩

我昔車輪翠裏行只今懷想似前生那知古寺僧窓下  
偶見高人眼倍明秋月半鉤留客意凍雲千頃欲歸情  
杖藜笑出千峯去添得蒼崖響答聲

雪夜讀涪翁所作愛之因懷其人和韻奉寄超  
然

溪雨初收岸草微柳絲堪入綠羅機望中情遠恨煙樹

何處暖多嫌衲衣却信真人還有夢豈關禪子未忘機  
春風痛與傳消息教憶舊山新翠歸

公亮超然見和因寄復答之

高人秀句入幽微濯出秦川錦一機剪製未為春步幃  
暗投先作夜行衣語尊九鼎真難荷意的千鈞善發機  
早晚杖藜松下見應疑劉遠谷中歸

瑞香花

靈根聞是花中瑞可憐亦肯乘春開色深卷肉淺巴錦

香濃入骨生秦梅也知秀麗不羣品最宜陰潔幽庭栽  
落英紅葉不忍掃從教狼藉蒙蒼苔

別靈源禪師

平生風骨秀琳琅水鏡曾懷未易量聲利光中忙趣少  
煙霞影裏淡心長雲泉隱德無情動猿鳥侵身不亂行  
他日定歸當卜築青藜紫蕨壯詩腸

贈許秀才

虬髯鐵面鶴精神水鑑心曾不受塵吹耳松風靠藜杖

敝衣山月岸綸巾虎頭猿臂成何事道骨方瞳亦可人  
他日西湖如過我飲君一味武林春

送軫上人之匡山

何處高人雲路迷相逢忽薦目前機偶逢菜葉隨流水  
知有茅茨在翠微瑣碎夜談皆可聽煙霏秋嶺欲同歸  
脩然又向諸方去無數山供玉麈揮

與晦叔至奉新

欲去未成還執手西風疎雨晚絲絲暗驚歲月行飄忽

那更人生苦別離君已到心工筆語我今歸計老茆茨  
冷齋後夜誰同宿莫向燈前讀此詩

送敏上人

密林病葉強翻紅已覺清秋夜氣濃懶復小窓邀獨秀  
却應歸夢挂雙峯水分淮甸當懸席路遶匡山可振筇  
若見虎溪谿上月為言相憶作衰容

過孜莫翁

禹穴朝來散晚參一程隨便達雲巖南山任把浮雲蔽

西嶺猶將落日銜幽徑野花開舊菊石牀楸子下高杉  
投宵夜永寒無寐良憶真僧衣不蠶

次韻二僧題永安壁上

二休書壁詩爭妙促席吟時愧不同豪句大鯨秋駕浪  
俊才細馬曉追風支筇放蕩千峯裏萬事收藏一笑中  
約我清溪老蓮社茅茨相映小橋東

贈王司法

輕帆已有渡江期高會清游惜此時水閣颺煙晴試茗



雪窓剪燭夜論詩衝寒遠鴈來橫浦弄色新梅半糝枝  
林下自知無一事亦應風月動關思

和許樂天

滄溟曾見化微塵花發桃源幾度春俗眼莫輕狂道士  
此身應是謫仙人清彈一曲悲風遠絕唱千章白雪新  
異日三茅成卜築却因瓶錫得為隣

師復作水餅供出五詩送別謝之

草堂野飯蜀江濱妥貼寒光刻削人忽展五篇爭疾讀

便驚四座暖生春已欣蓮社風流在更覺溪山氣味新  
放箸脩然廬嶽去門攔他日夢應頻

贈鑒上人

毗尼藏出清淨寶精進林生功德香但得身心常寂靜  
自然毛孔發靈光蒼苔不厭芒屨弊空翠偏宜壞衲荒  
好在虎溪長不出阿持何意尚遊方

贈靜上人

雪摧枯慮默如瘖秋壓寒松老不禁一室閉門稀識面

半窓斜照自拴針重城此日留詩別疊巘何年結伴  
尋衰退寧堪久塵土相看滿眼是歸心

表上人久事雲庵過余石門

凍折枯杉已死灰豈宜安著在塵埃  
衰不入今人眼  
精進曾親古佛來  
愛子渠渠念綈惠  
為余得得出巖隈  
蒼顏華首供衰暮  
未死重逢更幾回

次韻超然

翠寒空覺此生浮  
歲月催人鬢易秋  
忽憶倚天廬嶽去

更尋清境武林遊情親愧與高人別興發徒煩夜月留  
他日西湖遠相憶為君一笑散沙鷗

寄楷禪師

龍蛇頭角混埃塵臨死方知老淨因三度傲辭天子敕  
一生甘作淨名身虎皮羊質成何事牛馬襟裾亦謾陳  
須信屈原千載後空門猶有獨醒人

璉首座出示巽中詩

左手不仁右手明懷情亦復棄藜牀不知門外山花發

但覺君來笑語香  
頰紹神情掃秋晚  
瘦權詩句挾風霜  
兩翁杖屨相追逐  
此夕因依夜話長

贈李秀才

門掩青山相並居  
愛君家法不蕭疎  
錦囊舉子能佳句  
瑞鳥隱公多諫書  
學士八塲聲價在  
謫仙千首笑談餘  
清朝第一他年事  
且看歸來著翠裾

贈修上人

我愛修公亦自賢  
未忻城郭愛林泉  
醉騎鯨背詩遺落

閑把牛毛字細編還我青山當夏晚乞君佳句著牀前  
雨餘獨凭煙雲上目送孤鴻落照邊

次韻超然竹陰秋夕

月脇雲行夜未深滿庭風露葉辭林知誰牆外千竿竹  
分我窓西一畝陰山好已無歸國夢老閑猶有讀書心  
剩題詩句酬幽隱歲月翩翩接翅禽

廬山寄都下邦基德祖諸故人

勢占江南三百里煙霏相映出層樓芒屨竹杖山無水

坐看行吟春復秋，浮世萬途成底事。  
吾生一飽更何求，故人京洛風埃地。  
能信山中此樂不。

送宗上人歸南泉

燈外佳眠試冷齋，欲成歸夢暗驚回。  
一軒秋色侵衣重，半夜波聲拍枕來。  
江國潮平人獨令，海山家在意徘徊。  
倚藤明日秦淮上看子，風帆十幅開。

晚坐藏勝橋望石門

好山千葉青蓮曉，斫額令人意已消。  
微出樓臺知有寺。

倦行雲樹忽逢橋此生未覺叢林負肯處真教日劫超  
閒拾墮薪成淺立細泉幽澗響寒蜩

至圓通僧覓詩

漱霧跳珠響澗泉千峯秀出雨餘天共驚繡帽銅腮老  
重到香鑪石耳邊清境荒涼歸歎息故人迎笑尚依然  
明年過此還相見應及春風社燕前

送僧遊南嶽

古寺閒關聊作招夏秋歸思謾迢迢枕中柔櫓驚鄉夢



門外秦淮漲夜潮想見舊房生薜荔不堪疎雨在芭蕉  
何時却理緣雲策峯頂同誰看石橋

送隆上人

人生聚散等兒戲夢境紛然此一時老去漸知為客味  
秋來長作送人詩感君義色分心曲慰我年華兩鬢絲  
想見故鄉霜菊後屋頭千樹橘纍垂

次韻諒上人南軒避暑

人間酷暑推不去愛此南軒一榻空眼倦拋書成午睡

夢悠誰復羨王公豈知塵土隨肥馬但覺熏風掠壞桐  
起步西園閒倚杖石榴花出數枝紅

贈吳山人

已得希夷肯趣深平生蹤跡任浮沉壺中景待和煙卧  
海上山須帶鶴尋月裏一枝慵舉手人間萬事肯關心  
出塵風骨憑誰識且枕焦桐混世吟

東溪僧聽泉堂

諸方游徧歸來晚閒構虛堂贖世紛雷轉空山動林葉

雪飛亂石濺溪雲石橋舊處龍湫乳漱玉曾看嶽色分  
拄策眼高雙耳聳上方白塔却親聞

送莊上人歸雲居

青鎖曉開殘雨上煙鬟春解笑聲中叢林今日猶雌伏  
膺簡當年是法雄露盤憶嘗安樂味錦籠曾著瑞香關  
何時玉鉢青林下與子婆娑小立同


上元宿百丈

上元獨宿寒巖寺卧看篝燈映薄紗夜久雪猿啼嶽頂

夢回清月在梅花十分春瘦緣何事一掬歸心未到家  
却憶少年行樂處軟紅香霧噴京華

次韻黃次山見寄

君詩清絕似沅湘寫妙宣心氣味長地僻且爲三徑樂  
才高真是萬夫望隨流我自分涇渭賞駿誰能略牝黃  
自古豐城匿神物斗牛應覺動光芒



石門文字禪卷十

欽定四庫全書

集部

石門文字禪卷十一至

詳校官庶吉士<sub>臣</sub>汪彥博

侍讀<sub>臣</sub>孫球覆勘

覆校官庶吉士<sub>臣</sub>毛鳳儀

校對官主簿<sub>臣</sub>郭祚熾

謄錄監生<sub>臣</sub>劉能

欽定四庫全書

石門文字禪卷十一

宋 釋覺範 撰

七言律詩

春日同祖賢二道人步雲歸亭忽憶東坡此日

詩有懷其人次韻

誰家楊柳欲遮門  
依約東坡醉處村  
捶地不堪華屋句  
仰天空記刻舟痕  
尚餘千載風流在  
乞與三人語笑溫  
歸路松風吹凍耳  
共追前事弔英魂

與客論東坡作此

東坡醉墨浩琳琅千首空餘萬丈光雪裏芭蕉失寒暑  
眼中騏驎略玄黃機輪妙轉風雷舌春色濃纏錦繡腸  
可惜騎魚天上去斷絃空壁暗淒涼

京師上元觀駕二首

及時膏雨已闌珊黃道新泥曉未乾白面郎敲金輅過  
紅粧人揭繡簾看管絃叫月宣和氣燈火燒空奪暮寒  
咫尺鳳樓開雉扇玉皇仙仗紫雲端



閣雨輕寒斂夕氛青牛畫轂已爭奔  
皇州浩蕩風光裏紫陌喧闐笑語溫  
冠壓花枝馳萬騎簾垂繡箔卷千門  
特傳詔語君恩重凝睇天階謝至尊

次韻天覺進喜雪

萬馬天街聽啟關曉光佳氣溼人寰  
春生殿閣玲瓏外秀發園林頃刻間  
為瑞懽聲浮動植爭妍詩句麗江山  
從教飛上朱藍袂點綴彤墀玉筍班

別天覺左丞

童顏清光已渾圓共驚玉骨解藏年  
菴中篆縷長凝帳  
門外雲濤欲際天道眼從來無異見  
微蹤何幸預談禪  
新詩滿篋江南去又作叢林盛事傳

李德茂家有硯石如匡山雙劍峯求詩

胸次能藏大千界掌中笑看小重山  
飛來華嶽一峯尖  
幻出匡廬雙劍閒偶觸篆煙雲點綴  
戲澆硯滴瀑潺湲  
莫將道眼生分別隨意聊安几案間

余昔居百丈元夕有詩後十年是夕過京師期

子因不至

北游爛熳看并川重到皇州及上元  
燈火風光記前事  
管絃音節試新翻  
期人不至情如海  
穿市歸來月滿軒  
忽憶寒窗曾獨宿  
雪窓殘夜一聲猿

都下送僧歸閩

汴水悠悠去不回  
綠波垂柳眼初開  
日邊無意事迎送  
海畔有山歸去來  
却人頭忙日月緇  
飄山衲亂風埃  
此行若到忘情處  
拂石猿聲後夜哀

夜雨歇懷淵才邦基

劇笑無因見秀眉  
勞生會合恨難期  
永懷京國舊遊處  
伏枕夢魂初破時  
戰葉蕭蕭山雨後  
遶牀唧唧草蟲悲  
明年定復西歸去  
船尾何妨載我隨

寄權巽中

摩雲標格久去眼  
傳得詩詞錦段新  
雪玉在躬秋滿鬢  
風雷為舌語驚人  
留連南浦西山雨  
棄擲鑪峰繡谷春  
何日詩肩擁寒帔  
對牀聽我說京塵

書承天寺西齋壁

半年客食毗陵寺，頗厭塵埃污衲裙。  
雖有一身猶外物，且將萬事付浮雲。  
忽思放浪佳山水，要與頑麻散骨筋。  
涼夜滿庭風露重，竹梢微月欲紛紛。

靈隱送僧還南嶽

海隅相識笑談餘，清境同疑在玉壺。  
方作靈山棲小嶺，又隨茗水出東吳。  
透鬚白雪驚衰老，脫手青春入歎吁。  
懸想他年衡嶽寺，雨窓相對話西湖。

宿靈山示月上人

地靈形勝自天成  
山色溪光潑眼明  
壯岫飛來么鳳落  
東隣相去一牛鳴  
霜筠遶寺秋無數  
璧月臨軒夜更清  
已約高人結蓮社  
他年香火寄餘生

送僧歸石門

曾學雲菴逸格禪  
別來江柳幾春煙  
相逢水寺初嘗橘  
忽憶風簷共擘蓮  
遥想到山寒食後  
却思分首上元前  
與誰振策西湖路  
清曉一聲啼杜鵑

至西湖招廓然遊春

別後西湖長在夢相逢氣韻宛清真劇談要使君頤脫  
大笑從教坐客瞋淮海飄零方見友湖山秀絕更逢春  
快當火急追清景莫厭尋幽散策頻

廓然得石門信歎其踵席非其人用韻酬之二  
首

相對天涯歲月新石門消息遠難真垂閑且覓幾場笑  
疾惡休生一念瞋襯鷺芙蓉方破暖藏鷗柳色又殘春

光陰如此空搔首行誦知歸倦鳥頻

顏網安得見重新紅紫紛紛正亂真已矣無才吾自歎  
慨然有志子宜瞋閑尋陳迹消磨日強作新詩挽絆春  
振策蘇隄朝復暮路人應笑往來頻

廓然再和復答之六首

獨立湖邊一笑新紛紛世事信非真竹林逢寺端須往  
藜杖敲門不怕瞋僮僕見人空自若軒窓深處亦藏春  
老僧那識閑來興怪我時時過此頻



與君藉草湖邊坐聽我論懷句句真慵鬪睡魔強分怯  
懶酬詩債不須瞋亦知人壽一百歲已識老來三十春  
相見幾回開口笑憂愁風雨可勝頻

湖水行歌鴨綠新吳音清軟十分真但知客子幽情快  
不管游人醉眼瞋戈昔曾聞能倒日筆今猶喜解收春  
剩將詩句藏深篋歸去須知展玩頻

處處山川俱勝絕浦村風物自純真橫舟隔岸殊堪喚  
吠犬隨人不識瞋歸鳥獨飛當晚照鳴鳩相應正深春

心期卜築藏幽隱忽笑行行指劃頻

湖山昔夢雖非實開曉今游未必真久客情多空自厭  
故山歸晚欲誰瞋聊將愁裏十分興更賞湖邊一半春  
君儻肯來尤所願莫辜日日作詩頻

繞舍初晴對意新出門幽鳥語如真催耕布穀殊堪聽  
勸客提壺却莫瞋壠麥約風遠有浪海棠經雨忽添春  
可憐好景無人共回首斜陽太息頻

明日欲往龍華瞻大士像廓然和前詩叙其事

又用韻答之

雙林大士不復見聞說龍華畫像真要向冰霜識風骨  
願求清冷洗貪瞋空庭再拜儼如在扣几重看喜勝春  
我亦鈍根期聽法質疑他日故應頻

又和前韻二首

頭白逢人宛似新自嗟世態不容真君才廓落宜無合  
我語剛強屢被瞋千里來尋非愛雪一時行樂謾遶春  
隣居冷淡應相笑數夕溫然語話頻

篇篇俊逸間清新老閱羣才始見真秀却採蓮溪畔態  
豪吞指壁柱邊瞋肺腸舊信能纏錦文字今知解鬪春  
筆力肯低容我和詩成無惜寄來頻

偶讀和靖集戲書小詩卷尾云長愛東坡眼不  
枯解將西子比西湖先生詩妙真如畫為作  
春寒出浴圖廓然見詩大怒前詩規我又和  
二首

居士多情工比類先生詩妙解傳真只知信口從頭詠

那料高人作意瞋雲隨髮垂初破睡山低眉促欲嬌春  
何須夢境生分別笑我忘懷歎愛頻

輕狂舉世誰非偽遲鈍知余却甚真未把鄙懷投俗好  
且將狂語博君瞋已嗟心折垂垂老忍看花飛片片春  
滿眼閑愁圖不得江南無奈到心頻

錢濟明作軒於古井旁名永華賦此

刮地陰風翦玉塵那知此井解藏春折膠墮指嗟時事  
秀骨溫顏似主人碧甃湛明堪數髮小軒深靜可收身

超然高趣真難及浪士愚溪一笑新

鍾山悟真菴西竹林間蒼崖千尺歲久折裂余  
與敦素行山中至此未嘗不徘徊菴僧為開  
軒向之盡收其形勝名曰兩翁作此

水邊脩竹纔堪數竹外蒼崖已半頽我輩自退方外樂  
軒窓誰為此間開待邀山月月三人共要聽松風萬壑哀  
坐久篆畦香遶遍碧消煙縷雪殘灰

次韻敦素兩翁軒見寄

識暗長嗟未燭微坐令歸夢遶宮扉忽驚塵土登須鬢  
已覺雲山負衲衣孤坐知君扶瘦策此詩慰我脫危機  
天藏鍾阜一區勝乞與君儕為發揮

大風夕懷道夫敦素

病覺春寒花信重起來散策夕陽中方收一霎挂龍雨  
忽作千林擲鷗風淮水粘天雪翻浪吳山吐月鏡緣空  
二豪詩眼應驚闕覓句遙知與我同

宿鹿苑書松上人房二首

數峯煙翠疊黃昏忽見松間窈窕門好境未將佳句寫  
幽懷先與故人論隔林每恨音容阻此夕相逢笑語溫  
雪意不成應有月夜深同看湧金盆

冷齋託宿自携衾卧聽松風度栗林黃卷青燈紙窓下  
白灰紅火地鑪深夢回清響春崑溜夜久幽香噴水沈  
慣作橫刀眠下板為君令有住庵心

李師尹以端硯見遺作此謝之

歛珍先數刷絲紋那料端溪更逸群已作退閑今似我



溫然自重尚如君  
豈宜禪室埋聲價  
合在文場著策勳  
忍垢風標應有夢  
夢隨筆陣掃煙雲

次韻王節推安道見過雲蓋二首

湘山名與故山齊  
寺在沙村斷岸西  
繫馬槐根秋雨歇  
倚欄雲際暮猿啼  
公宜談笑光臺閣  
我合摧頽老澗谿  
袖有新詩如瀉出  
逼人駿氣不容羈

睡起春衫取次披  
髻雲隨從倚欄時  
生憎柳底鶯聲巧  
不分花前日影移  
伊昔笑來憂易老  
而今思去恨難追

林梢懸挂團團日無語東風玉箸垂

宿石霜山前莊夢拜普賢像明日到院見壁間

畫如所夢有作

十幅蛾眉紫翠寒何人逸想發毫端忽驚瑞色雲間相  
曾向清宵夢裏看影像不真心自寂悟迷無隔指空彈  
了然一念非新故我與羣生入正觀

贈湧上人乃仁老子也

照人風骨玉頎然來慰衰途亦自賢肝膽秋光磨洞徹

齒牙嶽色嚼芳鮮應傳畫裏風煙句更學詩中文字禪  
已作一燈長到曉定然百衲不知年

道林喜見故人

十年一別今重見風度依然照映人韻勝折松秋露骨  
氣和寒谷夜生春三都君已傳名譽萬事吾今付欠伸  
夢境樓鐘同此聽獨尋陳迹記前身

送日上人歸石門

三界無家誰適從大千俱集笑談中江南湖外夢到曉

宴坐經行月運空孤死懷生正邱首鳥棲知暖擇南風  
石門今日名天下想見沿崖一徑通

靈隱山次超然韻時超然歸南嶽住菴勸之

君亦工詩苦入神冥搜物象故應貧客兒亭下纔相見  
巾子峯前便卜鄰夢裏筆期生藥萼胸中鏡懶拂埃塵  
何當鉏斧住山去要看青原一角麟

湘山獨宿聞雨

殷牀鐘靜自垂簾庭樹無聲欲雪天山寺淒涼容我宿

地鑪深暖枕肱眠  
銅瓶秋蚓為誰泣  
蠟燭春花亦自妍  
夜半夢回聞驟雨  
十年蹤跡一茫然

讀三國志

無計酬勞夏簟涼  
遺編枕上閱興亡  
氣增髯竟從元德  
笑裏瞞徒造子將  
漢鼎未移存壯海  
蜀兵已挫失南陽  
莫將勝敗論人物  
忠義千年有耿光

妙高老人卧病遣侍者以墨梅相迓

高絲纔歇轉輕雷  
無數晴峯笑靨開  
大士已聞方卧疾

小空端遣出山來寶方世路知無隔俗駕山靈故勒回  
多謝高情餞春色十分渾在一枝梅

別李公弱

殘紅換得綠陰成隨分閑愁取次生須信百年終有別  
未能一日便無情何時嶽色君同看後夜湘晴我獨行  
好在西園行樂處為誰依舊月華清

贈闕西溫上人

鐵面關西氣逸群平生蹤跡付浮雲瓜州渡口曾同泛

石廬峯前又見君  
荔子招呼閩嶺外  
白粳留滯汝江濱  
拄藤更入西川去  
要讀豐碑未見文

將登南嶽絕頂而志上人以小團圓夸見遺作  
詩謝之

壑源獨步寶帶夸  
官焙無雙小月團  
未作濃甘生齒頰  
先飛微白上眉端  
湯聲蜂穉秋窓晚  
乳面鷺兒春甕寒  
飲罷為君登絕頂  
俯臨落日看跳丸

題草衣宮

鉏頭當枕草為氍毹曾與高人說任緣豈料大嫌沽世價  
未應虛費買山錢閑編木葉輕于紙細葺蘆花軟勝綿  
石室至今增壯觀可知千載得人傳

與僧遊石頭菴

我攜骨面潛谿子來訪西山鉏斧菴夢蝶人驚猶栩栩  
藏鷗柳暗已毵毵峯連小閣宜春望水遶重城隔夜談  
欲喚扁舟尋熟路與君支策上千崑

題還軒



老去情枯道自肥  
大刀破鏡露金機  
山邊湖水無行路  
枝上春禽亦倦飛  
半夜舟移空壑在  
故鄉家是昔人非  
炷香閑徧楞嚴義  
坐看煙消一縷微

送曉上人歸西湖白閣所居

我憶錢塘雪鬢新  
三年東望肺生塵  
那知南浦清湘岸  
忽見西湖白閣人  
熟視音姿疑夢寐  
便驚風物有精神  
悠然又入千峯去  
惆悵孤雲野鶴身

法輪齊禪師開軒于薺蔔叢名曰薺蔔二首

人世百年蝴蝶夢紛紛栩栩逐春繁觀根戲掃旃檀座  
隨意為開薝蔔園君每據梧深有味我來欲問自忘言  
叢林何必猶迷照香在枝頭不在軒

響石岫嶮峯下寺小軒開處近山房  
芻來問宗風事  
薝蔔為薰知見香聊復淡然成獨坐  
從教此語徧諸方  
鈍根不識金輪轉摘葉尋枝謾嗅芳

南嶽法輪寺與西林比丘居長老齊公築堂於丈  
室之西名曰雪堂作此寄之

法道陵夷賴典刑此堂真有助時心坐令衡嶽為嵩嶽  
便覺西林近少林面壁高風知獨振簷花細雨為誰深  
故應弟子分皮髓未愧駒兒善古今

送覺先大師覺先參佛照圓通二老

浮玉道人雷電舌法雲老師冰雪顏後來事聽諸方外  
先數君游二老間只把黑甜酬世味從教螺鬢有詩斑  
垂秋曳杖歸何處萬疊匡廬是故山

宿慈雲

門前便是小曹谿只欠孤猿嶺上啼水磨自鳴當濬澮  
漁舟閑泊近沙隄經游况是閑心遠富覽誰能與物齊  
一宿少留終未足會須移錫向高棲

和答素首座

勘破諸方剩得閑歸來嶽寺掩深關我行淺麓驚回地  
君在翔鸞香靄間契闊獨期當再見峻嚴爭說不容攀  
勿矜出岫無心久弱羽衝風亦欲還

道林送鴻禪者江陵乞食

一篙湘水碧于螺瑩淨無痕不受磨曉霧有情呵素鏡  
東風作惡卷纖羅老來談笑追隨少歲晚別離頭緒多  
浦口送君聊倚杖會看歸棹掠晴波

還太首座詩卷

料理詩情難復難縈心結思傾毫端奪回天地英秀氣  
坐令落紙生風寒老猿夜月叫蒼壁孤鶴曉霜疏羽翰  
精神清韻知幾許付與後來能者看

送秦少逸

秦郎毛骨玉壺秋望見令人忘百憂便覺宗之未瀟洒  
肯容如晦獨風流未為南嶽愴然別去作東華爛熳遊  
想見醉圍紅粉處雪牋佳句挽銀鈎

送僧歸筠

西津渡口唐朝寺到眼瀟湘饜飫看誰遣松聲環坐榻  
更令嶽色墮欄干君如鳥倦今知返我與鷗盟久已寒  
想見若耶溪上路正嘗盧橘帶甘酸

宿臨川禪居寺書方丈壁

雨過沙村繫客船行間樓殿帶晴煙夜深霜月涼于水  
門外雲濤遠際天禾稻豐登如棄土菱蓮甘美不論錢  
好峯不住猶行役忽憶鍾山掬澗泉

朱世英守臨川新開軒而軒有槐高數尺因名  
之作此

聖朝賢佐蔚如林天獨於君著意深喜氣欲傳黃閣信  
夏窓先露綠槐陰望雲忽起懷親念隱几難忘濟世心  
他日此軒成故事壁間應載野僧吟

世英梅軒

平生忠孝兩難忘  
乞得隣州近故鄉  
清  
白  
夜  
晴  
千  
里  
月  
肅  
巖  
秋  
迴  
一  
天  
霜  
數  
行  
徑  
徹  
臨  
清  
曉  
半  
印  
香  
消  
倚  
夕  
陽  
記  
取  
東  
軒  
談  
笑  
處  
庭  
梅  
他  
日  
似  
甘  
棠

送琳上人并序

孔子之門弟子三千人咸曰孔子自生民以來未  
有獨宋司馬桓魋害之欲殺者數矣未濟其欲猶  
至於伐樹削跡自是觀之則能賢者固難而知賢



者亦未易得者琳能口山谷又畜其像別余訪了  
翁豈可多得哉作此送之然琳曰明年當過谷山  
游南嶽諸刹也

髯琳身小膽崔嵬嚴冷中藏熱肺懷京洛歸來嘗自說  
湘山游徧與誰偕解將骨董藏涪叟又負簾笥訪了齋  
更說開春南嶽去要尋涪水看磨崖

次韻信民教授謝無逸游南湖

春游每覺客愁消最愛晴湖漲柳橋鴨綠陂寒初拍岸

鵲黃照影自垂條惱人風物今如許著意春光已不撩  
但得與君同一醉何辭日日作詩招

思禹兄生日

文章瑞世本奇豪風鑒霜天夜月高且袖玉堂批語手  
戲來山邑試牛刀意長千里奔潁尾恩重三山壓巨鼇  
滿薦壽觴何所祝祝公親見折蟠桃

崇仁縣與思禹閑游小寺啜茶聞碁

平生閱世等虛舟臨汝重來又少留攜弟來逃三伏暑

入門拾得一軒秋  
隔牆書水聞  
碁響陰屋涼  
生見樹幽  
又值能詩王主簿  
飯餘春露啜深甌

余居臨汝與思禹和酬甌字韻數首後寓居湘  
山思禹復和見寄又答之

泫蹄小邑著舫舟  
未起風雷更少留  
饌客酒酣顙玉纈  
侍兒歌送眼波秋  
詩成櫺葉江村處  
想見楊花院落幽  
綺席憶曾蒙設醴  
預聞談笑把空甌

次韻蔡儒効見寄

獨宿圓廬意自清  
夜涼林木寂無聲  
鏡中白髮今慵剃  
夢裏浮華已嬾爭  
故國別來空好境  
舊游誰與讀題名  
遙知他日重相見  
握手應驚太瘦生

金陵初入制院

依然收付建康獄  
拴索瓏璵驚市人  
寄語小兒休黷相  
未妨大士戲分身  
懶於夢境分能所  
枉把情緣比客塵  
笑視死生無可揀  
目前刀鋸若為神

寄超然弟

深掩園扉夜向闌夢驚清境慰辛酸卧聞瓦墼集微霰  
起覺衾裯壓薄寒憂患飽經心老大雲泉歸晚鬢凋殘  
書空偶爾成詩句寄與西林阿永看

初至海南呈張子修安撫

南來稍復召驚魂知有留侯異代孫赤印解衣甘九死  
試令騎馬賦千言瓊山有月光相射玉海無風浪自翻  
戲下應傳獲羅什禿頭爭看戴華軒

抵瓊夜為颶風吹去所居屋

貪看長鯨吸舟楫忽驚嬌蜃吐樓臺朦朧醉憶王城別  
汗漫游從海國來夜半颶風攜屋去朝來瘴霧放天回  
會須橫笛騎雲背笑響從教落九垓

出朱崖驛與子修

投老南來雪滿顛羈囚不自憶生全久為白骨今重肉  
已卧黃泉復見天報德定應追結草効忠那肯愧殮殮  
此詩清絕如冰雪乞與江山洗瘴煙

別子修二首

疆場探騎斷犇埃院落棠陰暗綠苔上疏乞閑追鮑龍  
載書歸老繼吳恢爭懷父母三年化愁見風帆十幅開  
勿剪青青堤下柳念公遺愛手親栽

漂泊孤蹤一轉蓬語音雖在變形容瘴鄉猿鳥今為伍  
螳穴王侯昔夢封海闊盲龜登木孔山高纖芥落鍼鋒  
公歸不得參行馭心折淮南紫翠重

蔡州道中

北來行盡關山道梁宋郊墟眼力微飲食甘酸雜淮甸

語音清軟近京畿黃塵又向九天去  
槁項新從萬里歸  
投老不堪行役苦手遮西日想崑扉

余號甘露滅所至問者甚多作此

老儼化身甘露滅不妨頭髮著伽梨  
虛舟閱世鴟夷子  
芻蕘闕除王伯齊香火自修心  
老大樓鐘重聽意淒迷  
餘生未覺全無累折脚鐺猶手自提

海上初還至南嶽寄方廣首座

天風吹笑落人間白髮新從死地還  
往事暗驚如昨夢



此生重複見名山倦禪想見堆危坐知法應拋放縱閑  
初嚼芳鮮動詩思一篇先寄倩君刪

陳生攜文見過

海外歸來兩鬢秋自嗟無地可逃羞攜筇肯過驚時聽  
炊黍能為信宿留睡觸屏風譏富貴笑分鸞社致公侯  
遺編家世丹青著鐵硯磨穿未肯休

至筠二首

乞漿問路到筠溪天氣清和得所宜父老相逢班草坐

風光初過採茶時  
摩挲禪榻營春睡  
想像齋厨辦晚炊  
白首不知舟壑走  
壁間來讀舊題詩

偶喚歸舟隔亂谿  
春山偏與晚相宜  
自尋熟路懸崖去  
正是新秧刺水時  
身健已如秋社燕  
夢回猶看客亭炊  
雨窓燈火清相對  
畫出淵明五字詩

示超然

秋光滿鬢萬事死  
慚愧眼明牙齒牢  
野寺閑眠聽風雨  
海山猶夢渡雲濤  
事非白傅方驚異  
迹隱庖丁已善刀

一徑莓苔三十載未容此老獨竒豪

九日

去歲重陽瘴海濱病拈霜藥嗅清晨身閑已斷思歸夢  
山好仍逢稱意人卯飯露葵欣旋摘夜窓風栗共嘗新  
妙年衲子應相笑癡鈍耽源老應真

二十日偶書二首

春林院落曲欄東小立初迎到面風冰齒寒生花坼信  
濕梅煙重雨毛空病衰老去登臨倦節物年時氣味同

却掩爐煙閉深閣忽驚西日借窓紅

此生早衰坐世故末路易歸驚嶮艱臨事無疑知道力  
讀書有味覺身閑解醫憂患臂三折難隱文章豹一斑  
永媿峽山赤頭瓊不令姓氏落人間

陳瑩中左司自丹丘欲家豫章至湓浦而止余  
自九峯往見之二首

雁蕩天台看得足却擬兒女寄蓬窓徑來潭水謀三頃  
偶愛廬山家九江名節逼真如醉白生涯領畧類湘龐

向來萬事都休理且聽樓鐘噓夜撞

與公靈鷲曾聽法游戲人間知幾生夏口甕中藏畫像  
孤山月下認歌聲翳消已覺華無蒂鑛盡今知珠自明  
遠壑夕陽殘雨後一番飛絮滿江城

次韻李端叔見寄

一官游戲且同塵夢寐江湖亦可人軒冕久知身是寄  
魚鰕纔說口生津解嘲鏡裏蕭疎髮時吐毫端浩蕩春  
自古浯溪好風月買山終欲與君隣

赴太原獄別上藍禪師

平昔巾盂共空壁只今樓觀礙層霄  
道心針水妙應在俗眼雲泥謾覺遥  
道路為家身是寄死生如夢意全消  
明年五頂東游徧來聽吳音發海潮

太原還見明於洪水上藍問明別後嘗寓則曰  
十年客雲居感歎其高遁作此

清軟吳音笑展眉芳鮮猶在雪霜姿  
十年不下歐峯頂一旦肯來漳水湄  
湘巘春深重記處風甌雨歇對聞時

紅塵未可因蹤跡要卜雲泉結後期

溫上人自廬山見過

崔羅門巷榻凝塵千里相尋駭四隣好事真誠虹貫日  
照人清氣水含春忽驚我禍今無比高笑君癡亦絕倫  
此別遙知想標格淺雲東嶠對冰輪

荷塘暑雨過涼甚宜之見訪作此

居近池塘春意任路穿空翠夕陽多隔林放鹿哀怨語  
掠水幽禽撲攬過得雨村囂覺風味分秧天氣愛清和

莫辭坐穩相尋數酣戰難回指日戈

重會言上人乞詩

海外歸來五見春  
黎衣兩識帝京塵  
此生已覺渾無累  
為累空驚尚有身  
厚善最憐山解事  
歲寒更愛月情親  
驚峯峯下重相見  
雪作飛花一笑新

誠心二上人見過

破夏來尋甘露滅  
快人如對水晶輪  
煙雲掃盡詞傳意  
知見不生情透塵  
旋縛茅茨吞遠壑  
偶臨簷隙見歸人



露芽便覺如浮雪品坐同分一盞春

秋夕示超然

殿閣知誰燒夜香矮窓燈火試新涼  
草蟲對語僧臨砌  
露葉翻光月轉廊補綴高風三韞闕破除闕夢一匡牀  
與君遊徧人間世折脚鐺中滋味長

鞦韆

畫架雙裁翠絡偏佳人春戲小樓前  
飄揚血色裙拖地  
斷送玉容人上天花板潤霑紅杏雨綵繩斜挂綵楊煙

下來閑處從容立疑是蟾宮謫降仙

石門文字禪卷十一

欽定四庫全書

石門文字禪卷十二

宋 釋覺範 撰

七言律詩

謁靈源塔

高颿駕浪過南溟  
那料歸來掃此亭  
桃李成陰春老大  
谿山好在鬢凋零  
瓦燈已照宮商石  
卯塔分藏服匿瓶  
春雪尚能知客意  
蕩除毛孔瘴煙腥

春日會思禹兄於谿堂

門前谿水蒲萄綠風掠松窓料峭寒  
忽憶十年同禍福  
那知今日共盤飧  
盡籤書策齊幽架已買漁舟泊小灘  
君會不嫌村落僻  
乘閑來此弄漁竿

招夏均父

北山深轉青松壑萬疊煙霏空翠堆  
元亮果堪中路竢  
子猷那敢棹舟回  
烏工魂夢尋公去蟬蛻塵埃出郭來  
他日荆林談笑處  
行人應指兩翁臺

贈僧

欹枕無人夢自驚  
回廊廣殿午風清  
已浮春露澆詩膽  
更炷水沉熏  
道情憂患撼牀聞  
螳鬪功名殷鬢作  
蚊聲  
欲依淨社陪香火  
僻處安排折脚鐙

資國寺西齋示超然二首

對眠偶此風雨夕  
又近寒窗櫺葉村  
謝書未焚風鑑在  
韋郎不見語言存  
歲時暗覺持山去  
憂患空驚斫水痕  
綠髮彫零心已死  
成蹊桃李落華分

人間炊黍未及熟  
萬事只今歸欠申  
已織青駒餞華駟

更披白帔稱閑身遺編終不求甚解故人但願長相親  
去年此日瓊南岸漲海翻天探騎塵

贈寄老菴僧

自憐玉鉢雙峯信來訪牛頭懶比丘山色深濃過夜半  
月華清亮近中秋已欣境勝如龍阜更覺菴幽占鳳頭  
夢幻此身猶且在杖藜投老得追遊

懷李道夫

半篙晚漲綠楊灣接翅鷗歸霧雨殘數疊吳山圍楚夢

一番花信釀春寒別時小語依然在隔歲來書展復看  
補衮胸中五色線只今應作怒蜺螭

余所居連超然自見軒日多啜茶其上二首

三生事辦吾知要一室香凝獨掩門睡足便驚清晝夜  
火紅消盡白灰存卷無俗駕螳紛繞隣有高人玉粹溫  
隱比侬膺猶可媿會茶時復到幽軒

功名今古一雞肋美味那知是禍根掃迹世途龜曳尾  
僻居烟霧豹埋文如期見訪穿窓月不告而行出岫雲

火浴未為無伴助塔吾遺骨尚煩君

徐師川罪余作詩多恐招禍因焚去筆硯入居  
九峯投老菴讀高僧曇諦傳忽作數語是足  
成之以寄師川師川讀之想亦見赦二首

歸來卧起有餘適老去消磨無雜緣門外不知何歲月  
夢中亦覺在雲泉千年高道誰酬價一世清閑我賣錢  
安得道人江北去此詩先錄寄師川

古書漫滅字欄斑眼倦顏然整頓閑以法為親疎世相



視身如幻寄人間業緣有盡今脫手老態無因日上顏  
已辨一瓢期澗飲要剗餘潤到崑山

雲崑寶鏡三昧

寶鏡當機不容傳纖毫滲漏墮言詮圓伊三點分賓主  
妙挾雙明絕正偏暗裏丹青元異色句中涇渭本同川  
嬰兒索物哆啞耳與物寧臆語未全

過永寧寺

已背荒南過永寧犯寒呵手捉枯藤雪如鏡底領絲白

山學誰家眉黛青射影風光知脫離伐冰門巷覺添增  
故人不用驚風帽我是前身卧像僧

十一月十七日發豫章歸谷山

急景窮冬一千里筍輿部曲去怱怱候船班草江津岸  
曝日探簷山店中袖手歸休今日是隔生冤債轉頭空  
湘西雪後青松徑想見聲監萬壑風

立春前一日雪

明日立春今日雪雪中殘響滴虛簷方增謾說寒威在

不絕潛知暖氣添客去旋開書對語閑多偏與懶相兼  
湘山自古愁眉淺縱御鉛華不到尖

明年湘西大雪次韻送僧吳

夜殘陡覺寒生骨夢斷空驕月轉簷瓶響卧聞秋蚓泣  
火紅起撥白灰添欲酬清景尋儂去更棹扁舟與子兼  
要倩新詩寫愁絕笑呵凍硯蘸毫尖

題清富堂

此堂冠絕湘西勝枯木名多道不窮用谷量雲當衣鉢

以江盛月展家風買山歸隱真寒乞借竹為軒落笑中  
綠錦漲連青玉浦剪裁磨琢費詩工

湘西暮歸

筍輿鼓角背層城湘水涸盡行沙汀嶽麓雪雲獻樓閣  
橘洲煙雨學丹青此生多艱付跛挈投老餘閑到寂惺  
蒼鬣萬身門窈窕歸來風葉掃空庭

效李白湘中體

夕光江搖魚尾紅何處扁舟開晚篷雁字初成春有信

烟鬟空好雨無蹤  
荒寒數葦橘洲岸  
領略半窓湘寺鐘  
浦口行人已爭渡  
林下歸僧欣一逢

次韻王舍人蘭室

起爇清香試返魂  
松花閑泛刷絲紋  
幽齋事業誰同辦  
小斛蘭叢手自分  
家世到今猶玉食  
交朋強半在青雲  
笑談麈尾延僧宿  
要聽清言洗俗氛

次韻熏堂

無言桃李已垂陰  
小雨南風自滿襟  
佳客偶來持茗盃

寶書看罷整瑤琴未容絲竹陶閑適盡把雲山付醉吟  
圖畫麒麟他日事不將行樂負初心

次韻寄傲軒

道夫飛鳥倦知還一鉢安巢又故山無累自然增逸興  
有名終恐廢長閑背時生計風煙上隨意園林指顧間  
應笑市朝爭奪者暗驚清鏡失朱顏

次韻吏隱堂二首

拄笏西山爽氣新萬人如海一閑身堂中自蠟登山屐

門外從增沒馬塵美祿方辭緣肆志華軒偶羨見清真  
遺編半掩思標致未必今人愧古人

此堂華構面層城意趣追回萬古情落帽被嘲真有道  
買金償謗亦求名黃庭卷掩凝香縷畫戟門深列衛兵  
安用山林笑朝市戲將軒冕寄餘生

次韻集虛堂

從來鮑靚有仙風腦滿方知氣自冲萬事收藏微笑裏  
十虛俱集一塵中乾城不礙丹青色天女何殊大小空

滿地落花春寂寂岸巾時倚曲欄東

次韻宿東安

淡雲缺月兩微茫獨酌沽來竹葉香已把功名比雞肋  
更驚世路似羊腸心情老去俱消盡詩律年來覺倍強  
解誦東坡北歸曲此身安處是吾鄉

次韻宿黃沙

無計遮攔歲月飛歲除江寺老垂垂自圍紅火堆危坐  
熟讀黃沙感歎詩已笑因山論肥瘠更驚逢水說分離



重湖去國三千里想見殘缸夢斷時

次韻雙秀堂

窓戶青紅花木繁午陰脩徑接深關人如巢許逃名迹  
山學娥英露髻鬟採菊悠然常獨見望雲時復對僧閑  
夜聞松雨驚飛瀑疑宿匡廬黃石間

次韻垂金館

風簷負日背胡牀千顆初驚昨夜霜喫霧香爭和露擘  
過牆枝作照林光佳名曾用題書尾小字仍呼背藥囊

先與兒曾為美兆讀書窓映笏頭黃

次韻贈慶代禪師

蓮峯千葉吐晴烟玉類遙知一粲然梅塢雪消香錯莫  
菴僧老盡氣完全暗驚夢蝶人間世回看醯雞甕裏天  
誰見清言橫麈尾滿庭風露竹娟娟

次韻宿清修寺

湘山也學廬山好落瀑聲飛繡谷風正欲來歸向兒說  
戲將收拾入詩中浪驚醉枕寒松響春滿茶鐺活火紅

清景骨飛嗟未到故應唯許夢魂通

次韻自清修過大瀉亂山間作

行盡湘南盡處山愛公高韻不容攀  
會當拭目瞻雙闕應笑尋幽到百蠻  
甚欲解鞍休犂确更能搢手弄潺湲  
定知醉看千嵒曉大字題名石壁間

次韻郴江有作

持節南來喜欲狂弄舟時得棹清湘  
然膏獨宿牽牛洞枕玉曾眠錦瑟傍  
未可便尋閑作伴不須先以醉為鄉

金城馳至陳方略要指先鋒一破羌

次韻題罷徭亭

聞君新構罷徭亭邂逅河源又報清  
郡郭不輸天子賦谿山偏協野人情  
唐虞暇日饒耕鑿秦漢當年浪戰爭  
風月倚欄如可借待攜斗酒話昇平

次韻題西林廓然亭

堂堂葉脫露遙天自炷臨軒一穗煙  
貴客獨遊聊爾耳道人相見亦欣然  
是身已悟浮漚久萬象中觀寶鏡圓

寄語橫機莫相試刻舟甘作小乘禪

次韻題方廣靈源洞

萬峯剔卓起孤峯慚愧靈源與世通花異空懷上林苑  
夢清疑宿廣寒宮泄雲吐雨遮金地濺雪跳珠落石闕  
忙裏為君成妙語豐碑正欲就崖龍

次韻題高臺

午梵知藏釋梵宮危臺遙喜石橋通下無俗駕攀緣至  
中有高人笑語同解執易為摩詰語經行難續德雲風

千竈萬壑吹松雨替說儂家勝義空

次韻題上封

天柱唯連紫蓋峯路危不與衆峯通  
瓢沽狹徑疑相值芋火何人想此風  
借榻醉魂窺凍螳凭欄詩眼送飛鴻  
空嗟千偈出山去半摺遺編看未終

次韻邵陵道中書懷

邵陵山水麗風光游徧歸來夜話長  
秋翠等閑開雉堞驚湍哀怨韻笙簧  
隨鞍此景憑詩寫他日塵紛一笑忘

上閣與誰同小立墜金柱笏說三湘

次韻雨中書懷

剌雨殘晴暴所長客窓花氣暝餘香每懷追逐雲泉慣  
無計遮攔歲月忙誰謂伐冰連戚里年來盡室泛沅湘  
詔書行看推門至已覺眉間一點黃

次韻題化鶴軒

當年舉網得雙鳥想見胎仙風度幽朱頂顧吾今未識  
長身意子是其流山家趣味無人共王事經過作意游

千里帝城何日去不妨佳處且遲留

次韻題澹山宮

華屋張燈展畫屏當年纖手指宮扃  
官游那料重湖隔醉裏空驚疊嶂青  
繡口詞章人復見筆華聲價夢通靈  
詩成獨立西風晚滿眼歸心插羽翎

次韻遊浯溪

浯谿山水今無恙浪士曾為爛熳游  
大字中興餘斷碣小舟空此醉垂鈎  
詞源不減無雙譽人品當時第一流



地坐摩挲增歎息高標想見尚橫秋

次韻題南明山凌雲閣

獨上凌雲百尺樓欄干一曲一遲留  
丁丁樵斧空山裏  
泛泛漁舟古渡頭  
蔽日綠陰鳴好鳥  
際天芳草牧青牛  
回頭城市分塵土  
堪笑王孫取次游

次韻言懷

此身已覺此生浮  
去作雲山老比丘  
古寺閑門人莫問  
寒綃蒙首涕慵收  
道林風月心能了  
子美工夫志未酬

為問太原王處士一甌春露可同不

次韻宿聖谿莊

家聲十輩擁朱輪更畜青牛解鬪犇應念高樓閑舞袖  
故憑山月洗吟魂助春泉落量雲谷輸稅人歸吠甌村  
被冷夜晴成好夢馬隨香霧入修門

次韻拉空印游芙蓉

翰墨平生氣吐霓詩成先喜示筠谿山中見客應偏好  
筆力知公不肯低夜寂據梧飢鼠出崑空同聽怪禽啼

上方聞說非人世更陟緣雲第幾梯

次韻縱目亭

高情與客凭欄處便覺身藏語笑中已許此生當樂死  
不辭老去坐詩窮遙知兵衛戎衣盛只欠花輪小袖紅  
絕境天藏今日獻千峰登眺豈人工

次韻游鹿頭山

吐詞秀似出盆絲好古幽情八詠思論字來尋魯公碣  
因詩曾訪少陵祠留題楚俗爭傳去懶賦山靈必有詞

定價文章比珠玉此篇不獨慰吾私

次韻題清風亭

特築飛臺丈室傍便驚形勝發天藏登臨時作一聲嘯  
已覺翛然兩袖涼待月拭除昏霧色看雲入得野花香  
君看抖擻鈴幘意欲替禪翁為舉揚

次韻法林禪寺

聞道高人願力深幽居端與法為林風泉松雨隨宜說  
密室晴軒共一音意妙故應人不薦地偏還喜我相尋

夜闌更入詩三昧消盡平生未死心

次韻凭欄有作

金殿誰焚南海香  
靄然芬馥撲回廊  
數枝銀燭高低照  
兩箇清螢上下光  
風度素秋驚宿鳥  
水涵碧澗濯游舫  
攔干獨倚無人問  
細細孤吟月滿堂

次韻渡江有作

棄舟植杖首重回  
隔岸遙聞津鼓催  
淮上梅傳春信至  
江南山逐笑聲來  
行瞻瑞霧籠雙闕  
更看神光發五臺

王事幸陪方外樂為君點筆走風雷

題善化陳令蘭室

種性難教草掩藏蒼然小室為誰芳  
擲培几案軒窓碧坐歎賓朋笑語香  
糝地露英猶潔白快人風度更纖長  
議郎嗜好清無滓獨有幽蘭可比芳

快亭

太丘作邑付絃歌剩得清閑可奈何  
滿地棠陰驚晝永小亭詩眼覺天多  
佳眠夏簟便光滑醉耳松風喜再過

想見句成書  
斐几侍兒濃  
笑出微渦

次韻邵子中學句游嶽山攜怪石歸

衡嶽垂春著  
意游詩詞不  
獨錦囊收又  
攜峯頂雲房  
石歸致幽齋  
夏簟秋塵下  
笑談且同夢  
胸中涇渭自  
分流忽驚几  
案寒層出卧  
看令人憶故  
邱

和周達道運句題怪石韻

愛山心志如  
君少王事何  
妨陟翠微怪  
石方欣典刑  
在新詩仍寫  
畫圖歸客來  
一室煙光滿  
掌上千崑眼  
力稀

頗怪周郎賞音者獨於此境尚彈機

次韻見寄喜雨

議郎詩膽久崔嵬敏句無煩急雨催  
玉局波瀾嗟已絕少陵風力賴追回  
蕩晴香霧吹紅藕迴地花茵疊紫苔  
靜極涼生聞剝啄渡湘知有道人來

次韻題方圓菴

比物曾聞知姓名樹間斛懸林百升  
此菴外圓似孟覆其地中方如鏡平  
善不近名真有道高非絕俗更幽情



會當目擊維摩老端作毗耶問法行

贈許彥周宣教游嶽彥周參機道者

一幅紗巾九節筇翛然生計似龐公孤雲野鶴登空去  
萬壑千岑墮笑中岫嶠晴披應獨往懶瓚醉卧與誰同  
遙知勘破癡禪老想見臨機面發紅

次韻游南嶽

天迥游絲百尺輕水寒時覺縠紋生琢磨佳句輸吾弟  
文點春眠付老兄山寺獨來無一事竹軒相對有餘清

永懷東院成千古寂子難忘叔姪情

次韻彥周見寄二首

詩先春色附湘船來與幽人結淨緣句好空驚碧雲谷  
韻高疑在白鷗前君應歸誦陶彭澤我亦南尋率子廉  
想見江頭同握手採茶時節雨餘天

歸思啼禽日夜催寶書臨罷意徘徊榆錢滿地買春去  
嶽色渡江排闥來行樂風光清夢曉卧披煙雨曲屏開  
興來敏速詩千首落筆人驚挾怒雷

彥周借書

湘上清山爽氣浮  
開軒相對亦風流  
但工酣寢成疎懶  
甚拙謀生太謬悠  
數筆江村供晚望  
一蓑煙雨助詩愁  
借書知子能醫國  
有志常先天下憂

彥周法地弟作出家菴又自為銘作此寄之

迂濶菴成又自誇  
要令妙語發天葩  
未容臨濟終仆地  
正賴雲門已出家  
少日浪曾參泐水  
暮年端合在丹霞  
贈君草屣游山去  
勘破諸方一笑譁

二月大雨江漲晚晴作三首

春寒作意攪吟魂，欲出雲濤已濺門。  
入畫瀟湘連雉堞，落梅煙雨暗江村。  
依蒲覓句壯心在，附火抄書老眼昏。  
一掬幽懷收拾得，謾題窓紙與誰論。

我在湘西畫牒中，時高時作送飛鴻。  
事治山翠經旬雨，印可春晴盡日風。  
引步幽探聊自適，滿懷疎快與誰同。  
東君傾寫無餘蘊，都放山茶稱意紅。

投老歸來楚水濱，水清聊可濯衣塵。  
拚心樂事都還汝。

入手清閑不與人尚有笑談消白晝更無情緒管青春  
暗驚少日王城外走馬爭先看寶津

陳大夫見和春日三首用韻酬之

詠君好句欲消魂想見朱轡畫戟門解組正當強健日  
載書歸老水雲村虛堂風撼牙籤響密室嵐蒸畫牒昏  
偶在湘山最佳處舊遊閑與野僧論

無復搜詩慘淡中便能落筆敏驚鴻高情不在兩疏後  
句法追回二謝風傾蓋未論桑梓舊忘年先喜唱酬同

朱顏長覺清光溢不學東坡是醉紅

詩軸來尋寂寞濱把看字字蛻埃塵江南家世休相問  
陳氏文章不乏人嶽色渡江長自好桃花滿縣不勝春  
克家有子如麟鳳骨相吾驚是要津

過瀉山陪空印禪師夜話

濃翠濕衣三十里渡谿知背幾重雲忽驚寶構從空墮  
便覺風光與世分夜久天香凝錯莫庭開花雨自繽紛  
他生曾伴安禪地此夕樓鐘復共聞

空印以新茶見餉

喊山鹿藪社前摘出焙新香  
麥粒光撼樹師應懷大仰  
傳甌我欲學南陽要看雪乳急傳筴  
旋碾玉塵深住湯  
今日城中雖獨試明年林下定分嘗

空印見招住菴時未能往作此寄之

獨立天衣四世孫  
作家手段典刑存  
大瀉路峻諸方讓  
空印風高四海聞  
有願欲依龍象衆  
無求羞逐鷺雞群  
此生一聚灰中骨  
終葬千峯頂上雲

空印見和用韻答之

綦布諸方盡子孫道緣渾似雪峯存全提蓋色騎聲句  
直要臨機以眼聞圍繞千僧名冠世指揮萬象語驚群  
獨能收此無家客分占瀉源一塢雲

龍興禪師大陽的孫居枯木堂新植楚竹余愛  
其家風為賦之

門外追奔沒馬塵堂中安頓自由身脩筠有淚知誰恨  
枯木開花為我春隔岸雲山猶可借滿懷風月未全貧



小詩勿笑清如畫聊為高人戲寫真

題德明都護熏堂

占叢濃碧繞虛堂堂上仙郎戲比芳香並蕙蘭終漏泄  
色同草木浪遮藏過牆山潑軒窓翠吹鬢風生燕寢涼  
敏豆才高家法在要看落筆擁紅粧

題季長冰壺軒

閑軒清似冰壺水軒上人如元紫芝坐覺秋光潑毛髮  
客來春色滿談詞寶書讀罷依蒲久玉塵經行曳履遲

卷挂一聲林葉動黃昏月出雪消時

明應仲出季長近詩二首次韻寄之

露葉朝陽沃棗桑暑風吹鬢蕩蓮香已欣點水蜻蜓款  
更覺營巢燕子忙翠浪舞翻爭漲龍黃雲割盡想登場  
小樓楯瓦誰庭院弱柳多情故掩藏

偶尋隣叟問桑麻踏盡山蹊糝徑花傳得新辭春爛熳  
更驚行草醉歌斜遙知小縣少公事想見高情照物華  
尚念無家甘露滅一蓑煙雨似玄沙

和傅彥濟知縣

句法疑君每太高  
湘南山水助揮毫  
暫臨小邑聊觀政  
未見金牛可受刀  
珠玉光難藏瓦礫  
芝蘭香豈掩蓬蒿  
坐令百里清如鏡  
吏猾民姦豈易逃

寄題劉居士環翠菴

平生不識劉居士  
想見茅菴枯瘁姿  
百八珠輪紅瑪瑙  
萬千峯遶碧瑠璃  
笑人經卷鑽故紙  
彼世金珠似芥籬  
折脚鐺中誰共過  
小龐真是出家兒

次韻思禹兄見懷

刺桐花映野薔薇  
湘水侵門過客稀  
此日音書經歲隔  
何時麈尾對君揮  
樓高三楚天空闊  
夜久千崑月正暉  
我託叢林如越鳥  
南枝雖穩亦思歸

次韻思禹題方竹

不改平生歲寒操  
近來隨世解方圓  
知君出異驚群聽  
顯我尋常是一偏  
但見蒼官遭寵錫  
那知青士亦超遷  
水花院落春風晚  
庭種連蕉怪石前

蜀道人明禪過余甚勤久而出東山高第兩勤

送行語句戲作此塞其見即之意

衆中聞語識巴音京洛沅湘久訪尋張口茹拳君聚落  
垂膺拭涕我山林碧嵩花墮鳥飛去蒲坐葉飄針正絰  
袖裡兩勤太饒舌丈夫聲價老婆心

送珠上人重修五宗語要

五宗抄語挾風雷佛日將傾賴取回蒼蒿花香已零落  
旃檀塔坐更塵埃鈍根厭看摩挲去妙手端能拂拭開

當有異人來荷法叢林因子見奇瑰

光上人送墨梅來求詩還鄉

南嶽有雲留不住東歸結伴過湘湄  
解將疎影橫斜句不換垂珠的皪詩  
癯甚鳬肩寒入畫清哉鶴骨老難醫  
定知入嶺風煙暮正及追胥餽歲時

送瓊大師歸禪寂

近聞禪寂似叢林總衆能為世所欽  
百巧難磨真實行兩塗不改歲寒心  
衣今堪色如栗色語未吳音變楚音

盛夏入城緣底事扁舟湘水獨相尋

贈道法師

道公膽大過身軀敢逆龍鱗上諫書獨欲袒肩擔佛法  
故甘引頸受誅鉏三年竄逐心無愧萬里歸來貌不枯  
他日教門綱紀者近聞靴笏趣朝趨

谷山沙彌求詩

十里松風長不老一庭秋色為誰閑偶逢此日休新夏  
偏見耆年憶故山貧裏有秋同舉箸法中添口共開顏

偶然弄筆成詩句乘興留題屋壁間

贈羅道人

蛻塵標韻矯翔鸞鬢髮樓颼風露寒脫舄骨飛何日見  
解衣沐浴萬人看肯來從我脩然住皆說他人屈致難  
戲作猫聲行聚落自忘身是晉郎官

次韻張司錄見寄

不曾識面已傾倒便覺胸中涇渭分句精不減李長吉  
才高大類沈休文看山詩眼湛如水拄笏爽氣高摩雲



他年竹屋夜連榻妙句懸知過所聞

郭伯成榮登

快馬東風走帝京歸來門卷綠陰成  
項知一第文章貴能致三公衮冕榮  
子涉風波方善探我閑几硯覺塵生  
贈詩誰似王摩詰翰墨場中獨策名

題天王圓證大師房壁

閉戶不妨依聚落開軒隨分有山林  
殘經半掩世情斷好鳥一聲村意深  
籬外霜筠森束玉屋頭露橘欲垂金

能營野飯羹紅醬渡水何辭數訪尋

寄題達軒

羊腸世路替人愁袖手歸來事事休  
只有信緣唯得計不過隨分復何求  
數聲屬玉滄浪晚一塢黃雲秣稷秋  
寄語封侯塞垣外何如高卧小軒幽

題雲嵒筠軒

雨葉風枝小徑通拂砧清坐有誰同  
粉衣香滑秋叢瘦泉珮丁東夜壑空  
半世已歸彈指內前途都付枕肱中

隄防老境猶多事折脚鐺炊腐顆紅

逍遙遊山歸見示唱和詩軸口占和之

游遍名山過水西夜談奇語盡橫機君如檻鹿猶思奮  
我似棲禽已倦飛聞道老禪能眷舊更煩諸衲借餘輝  
欲知勝踐多佳思懷得新詩滿袖歸

送誼叟歸北山

南臺山淺北山深深處開軒更茂林作夏懸知成契闊  
扁舟乘興一相尋燈青竹屋風雨夕谿遶石門鄉井心

投老都忘身是客  
坐中談笑盡吳音

偶書寂音堂壁三首

巾瓶挂壁亦翛然  
無所營為地自偏  
句法不能醫老病  
夢游時解到林泉  
扶持瘦玉筇隨步  
堆疊荒雲衲半肩  
小住閒庭數歸鳥  
從教人作畫圖傳

寂音閒殺益風流  
寒涕垂膺懶更收  
得失是非都放却  
死生窮達信緣休  
湘中戲劇三千首  
海上歸來十二秋  
齋罷展單吾自課  
暮年眠食更何求

霜須瘡面老垂垂瘦搭詩肩古佛依滅跡尚嫌身是累  
此生永與世相違殘經倦讀閑凭几幽鳥獨聞常掩扉  
寢處法華安樂行蕩除五十二年非

石門文字禪卷十二